



**GEDIG VOORDRAG KOMPETISIE.**

**2024**



## **GRAAD 4 GEDIGTE:**

### **MENEER IGNOREER**

Meneer Ignoreer!  
Dis my naam vandag.  
Om anderpad te kyk,  
dis my superkrag.  
Maak nie saak wie my vandag  
wil treiter of terg nie.  
Dis water op 'n eend se rug.  
Ek gaan my nie vererg nie.  
Is jy op soek na moeilikheid?  
Hier gaan jy dit nie kry nie.  
Lus vir stry en skoorsoek?  
Jammer, ek's nie in die bui nie.  
Jy kan maar name noem;  
ek maak of ek nie hoor nie.  
My humeur pas ek mooi op;  
ek gaan dit nie verloor nie.  
Maak nie saak of jy my skel  
of leuens oor my vertel nie.  
Noem my Koning Koel en Kalm;  
niks kan my onstel nie.  
Maar...  
... dalk moet jy liewer  
nie iets doms prober nie –  
môre is ek dalk nie meer  
Meneer Ignoreer nie!

*Jaco Jacobs*


**BESOEK**  
**[WWW.NUKLEUS.CO.ZA/KULTUUR-KOMPETISIES](http://WWW.NUKLEUS.CO.ZA/KULTUUR-KOMPETISIES)**  
**OM IN TE SKRYF**





**GEDIG VOORDRAG KOMPETISIE.**

**2024**



## **DRAAKDOEPA**

Raak jou draak  
tam en moeg?  
Het hy ophou  
vlamme spoeg?  
Voel jou draak  
flou en verlep?  
Volg dié  
maklike resep.  
Neem 'n hal-  
we koppie kerrie,  
twee eetlepels  
peri-peri,  
brandrissies  
('n emmer vol)  
en meng dit  
in 'n groot kastrol.  
Laat dit dan  
'n uur lank kook  
tot dit gloei  
en sis en rook.  
Sprinkel biskruit  
oor na smaak  
en voer dit warm  
vir jou draak.  
Net een happie  
is genoeg...  
Jou draak sal lustig  
vlamme spoeg!

*Jaco Jacobs*


**BESOEK**  
**[WWW.NUKLEUS.CO.ZA/KULTUUR-KOMPETISIES](http://WWW.NUKLEUS.CO.ZA/KULTUUR-KOMPETISIES)**  
**OM IN TE SKRYF**





**GEDIG VOORDRAG KOMPETISIE.**

**2024**



## **HOENDERMISPASTEI**

Hoendermispastei  
is 'n baie rare dis,  
met 'n nare hoofbestanddeel.  
(Jip, dis hoendermis).  
As jy wonder hoe dit smaak –  
ek moet erken ek weet nie.  
Niemand wat ek ken,  
het dit nog ooit geëet nie.  
Dalk wil jy dit proe,  
dalk soek jy 'n skeppie,  
maar geen resepteboek  
bevat daardie resep nie.  
Nêrens waar ek was  
kon ek dit nog ooit bestel nie –  
by geen goedkoop straatkafee  
of peperduur hotel nie,  
dit is nêrens te kry  
in 'n vyfsterrestaurant nie,  
dit help nie eens jy soek  
in die verste, verste land nie.  
Nêrens op 'n spyskaart  
kry jy hoendermispastei nie.  
Maar sê my nou doodeerlik –  
is jy nie ook maar bly nie?

*Jaco Jacobs*

**BESOEK**  
**[WWW.NUKLEUS.CO.ZA/KULTUUR-KOMPETISIES](http://WWW.NUKLEUS.CO.ZA/KULTUUR-KOMPETISIES)**  
**OM IN TE SKRYF**

